

**ტექნიკური რეგლამენტი - „ადამიანის მოხმარებისათვის განკუთვნილი
კაკოსა და შოკოლადის პროდუქტების შესახებ“**

მუხლი 1. პროდუქტის უსაფრთხოებისა და თავისუფალი მიმოქცევის კოდექსის 56-ე მუხლის პირველი ნაწილის, 58-ე მუხლის მე-2 ნაწილისა და სურსათის/ცხოველის საკვების უვნებლობის, ვეტერინარიისა და მცენარეთა დაცვის კოდექსის 75-ე მუხლის მე-2 ნაწილის შესაბამისად, დამტკიცდეს თანდართული ტექნიკური რეგლამენტი - „ადამიანის მოხმარებისათვის განკუთვნილი კაკოსა და შოკოლადის პროდუქტების შესახებ“.

მუხლი 2. ადამიანის მოხმარებისათვის განკუთვნილი კაკოსა და შოკოლადის პროდუქტები, რომელიც ბაზარზე განთავსებულია ან ეტიკეტირებულია ამ დადგენილების ამოქმედებამდე და არ შეესაბამება ამ დადგენილებით დამტკიცებული ტექნიკური რეგლამენტით განსაზღვრულ მოთხოვნებს, დასაშვებია ბაზარზე განთავსებულ იქნეს სურსათის ვარგისიანობის ვადის გასვლამდე, მაგრამ არაუმეტეს 2022 წლის პირველ იანვრამდე.

პრემიერ-მინისტრი

მამუკა ბახტაძე

ტექნიკური რეგლამენტი - ადამიანის მოხმარებისათვის განკუთვნილი კაკაოსა და შოკოლადის პროდუქტების შესახებ

მუხლი 1.ზოგადი დებულებები

ტექნიკური რეგლამენტი “ადამიანის მოხმარებისათვის განკუთვნილი კაკაოსა და შოკოლადის პროდუქტების შესახებ” (შემდგომში - ტექნიკური რეგლამენტი) ადგენს მოთხოვნებს კაკაოსა და შოკოლადის პროდუქტის მიმართ და აწესრიგებს ბიზნესოპერატორის მიერ კაკაოსა და შოკოლადის პროდუქტების წარმოების, გადამუშავების, დისტრიბუციისა და ბაზარზე განთავსების პირობებს.

მუხლი 2.მიზანი და გამოყენების სფერო

1. ტექნიკური რეგლამენტი მიზნად ისახავს კაკაოსა და შოკოლადის პროდუქტების გადამუშავების, დისტრიბუციის ეტაპებზე რეგულირების ერთიანი პრინციპების განსაზღვრას და მომხმარებელთა უფლებების დაცვას.

2. ტექნიკური რეგლამენტი ადგენს მოთხოვნებს:

- ა) კაკაოს და შოკოლადის პროდუქტების დასახელების შესახებ;
- ბ) ადამიანის მოხმარებისათვის განკუთვნილი კაკაოსა და შოკოლადის პროდუქტების ბაზარზე განთავსების პირობების შესახებ;
- გ) ნებაყოფლობითი (არასავალდებულო) დასაშვები ინგრედიენტების მიმართ;
- დ) ბიზნესოპერატორის მიმართ;
- ე) კაკაოსა და შოკოლადის პროდუქტების შესაბამისობის კონტროლის პროცედურების მიმართ.

მუხლი 3. რეგულირების ობიექტი

რეგულირების ობიექტებია კაკაო და შოკოლადის პროდუქტები. მათ შორის:

- ა) კაკაოს ცხიმი ;
- ბ) კაკოს ფხვნილი, კაკაო;
- გ) შოკოლადის ნაირსახეობები;
- დ) შოკოლადის სხვა პროდუქტები;

ე) სხვადასხვა ფორმის შოკოლადი.

მუხლი 4. მოთხოვნები კაკაოს და შოკოლადის პროდუქტების დასახელებების მიმართ

ამ მუხლით განსაზღვრული სურსათის დასახელება გამოყენებული უნდა იქნეს მხოლოდ ადამიანის მოხმარებისათვის განკუთვნილი კაკაოსა და შოკოლადის იმ პროდუქტებისათვის, რომლებიც აკმაყოფილებენ ამ მუხლით განსაზღვრულ მოთხოვნებს. კერძოდ:

ა) **კაკაოს ცხიმი, ან კაკაოს სრესილი ცხიმი** - ცხიმი, რომელიც მიღებულია კაკაოს მარცვლებიდან ან კაკაოს მარცვლების ნაწილებიდან და რომელშიც თავისუფალი ცხიმოვანი მჟავების (გამონახტული როგორც ოლეინის მჟავა) მასური წილი შეადგენს არაუმეტეს 1,75%, ხოლო გაუსაპნავი ნივთიერებების მასური წილი შეადგენს არაუმეტეს 0,5 %-ს (განსაზღვრა პეტროლეინის ეთერის გამოყენებით). კაკაოს სრესილი ცხიმისათვის, გაუსაპნავი ნივთიერებების მასური წილი შეადგენს არაუმეტეს 0,35 %-ს;

ბ) **კაკაოს ფხვნილი, კაკაო** - პროდუქტი, რომელიც მიღებულია გასუფთავებული, კანგაცლილი და მოხალული კაკაოს მარცვლების ფხვნილად გარდაქმნით და რომელიც შეიცავს არანაკლებ 20 % კაკაოს ცხიმს (მშრალ ნივთიერებაზე გადაანგარიშებით) და არაუმეტეს 9 % წყალს;

გ) **კაკაო შემცირებული ცხიმით, კაკაოს ფხვნილი შემცირებული ცხიმით** - პროდუქტი, რომელშიც კაკაოს ცხიმის შემცველობა 20 %-ზე ნაკლებია (მშრალ ნივთიერებაზე გადაანგარიშებით);

დ) **შოკოლადის ფხვნილი, შოკოლადი ფხვნილისებური** - პროდუქტი, რომელიც შედგება კაკაოს ფხვნილისა და შაქრის ნარევისაგან და რომელშიც კაკაოს ფხვნილის შემცველობა შეადგენს არანაკლებ 32 %-ს ;

ე) **შოკოლადი სასმელი, კაკაო დამტკბარი, კაკაოს ფხვნილი დამტკბარი** - პროდუქტი, რომელიც შედგება კაკაოს ფხვნილისა და შაქრის ნარევისაგან და შეიცავს არანაკლებ 25 % კაკაოს ფხვნილს. იმ შემთხვევაში, თუ მასში კაკაოს ცხიმის შემცველობა 20 %-ზე ნაკლებია (მშრალ ნივთიერებაზე გადაანგარიშებით) ამ დასახელებას თან უნდა ახლდეს ტერმინი - „შემცირებული ცხიმით“ ;

ვ) **შოკოლადი (იგივე მწარე შოკოლადი, ნახევრადტკბილი შოკოლადი, შავი (მუქი) შოკოლადი ან “chocolat fondant”)** - პროდუქტი, რომელიც მიღებულია კაკაოს პროდუქტებისა და შაქრებისგან და რომელიც, მშრალ ნივთიერებაზე გადაანგარიშებით, შეიცავს არანაკლებ 35% კაკაოს მშრალ ნივთიერებას, მათ შორის

არანაკლებ 18 % კაკაოს ცხიმს და არანაკლებ 14 % კაკაოს მშრალ, უცხიმო ნივთიერებებს;

ზ) „ვერმიშელის“ ან „ფანტელის“ ფორმის შოკოლადი (იგივე მწარე შოკოლადი, ნახევრადტკბილი შოკოლადი, შავი (მუქი) შოკოლადი ან “chocolat fondant”) - პროდუქტი, რომელიც წარმოდგენილია ვერმიშელის ან ფანტელის ფორმით. მიიღება შერევის, ექსტრუზიის და გამყარების პროცესებით, რომელიც პროდუქტს ანიჭებს განსაკუთრებულ ხრამუნა თვისებას. მასში კაკაოს მშრალი ნივთიერების შემცველობა უნდა შეადგენდეს არანაკლებ 32 %-ს, მათ შორის არანაკლებ 12 % კაკაოს ცხიმს და არანაკლებ 14 % კაკაოს უცხიმო მშრალ ნივთიერებებს. ვერმიშელის ფორმის შოკოლადს აქვს მოკლე, ცილინდრული გრანულების ფორმა, ხოლო ფანტელის ფორმის შოკოლადს - მცირე ზომის ბრტყელი ფირფიტების ფორმა;

თ) შოკოლადი „კუვერტური“ - პროდუქტი, რომელიც მშრალ ნივთიერებაზე გადაანგარიშებით შეიცავს არანაკლებ 35 % კაკაოს მშრალ ნივთიერებას, მათ შორის არანაკლებ 31 % კაკაოს ცხიმს და არანაკლებ 2,5 % კაკაოს უცხიმო მშრალ ნივთიერებას;

ი) შოკოლადი თხილით (თხილიანი შოკოლადი) -“Gianduja“ (ან სიტყვა „Gianduja“- დან წარმოშობილი ერთ-ერთი დასახელება) - პროდუქტი, რომელიც უპირველესად მიღებულია შოკოლადისგან, რომელშიც კაკაოს მშრალი ნივთიერების შემცველობა არანაკლებ 32%-ს შეადგენს, ხოლო კაკაოს მშრალი უცხიმო ნივთიერებების შემცველობა სულ მცირე 8%-ია, და წვრილად დაქუცმაცებული თხილის გამოყენებით, რომლის შემცველობა 100 გ პროდუქტში უნდა შეადგენდეს არანაკლებ 15 გ-ს და არაუმეტეს 40 გ-ს. პროდუქტს შესაძლებელია დამატებული ჰქონდეს:

ი.ა) აორთქლების შედეგად მიღებული რძე და/ან რძის მშრალი ნივთიერებები, იმ რაოდენობით, რომ მზა პროდუქტში რძის მშრალი ნივთიერების შემცველობა არ უნდა აღემატებოდეს 5%-ს;

ი.ბ) ნუში, თხილი ან კაკლისებრთა სხვა სახეობები, მთლიანი ან დანაწევრებული, იმ რაოდენობით, რომ დაქუცმაცებულ თხილთან ერთად მათი რაოდენობა არ უნდა აღემატებოდეს პროდუქტის საერთო წონის 60%-ს;

კ) რძიანი შოკოლადი - პროდუქტი, რომელიც მიღებულია კაკაოს პროდუქტების, შაქრების და რძის ან რძის ნაწარმისაგან და მშრალ ნივთიერებაზე გადაანგარიშებით შეიცავს:

კ.ა) არანაკლებ 25 % კაკაოს მშრალ ნივთიერებას;

კ.ბ) არანაკლებ 14 % რძის მშრალ ნივთიერებას, რომელიც მიღებულია მოუხდელი რძის, ნახევრად ან სრულად მოხდილი (გაუცხიმოებული) რძის, ნაღების ნაწილობრივ ან სრული დეჰიდრატაციით, ან ნაწილობრივ ან სრულად დეჰიდრირებული ნაღების, კარაქის ან რძის ცხიმისაგან;

კ.გ) არანაკლებ 2,5 % კაკაოს უცხიმო მშრალ ნივთიერებას;

კ.დ) არანაკლებ 3,5 % რძის ცხიმს;

კ.ე) საერთო ცხიმშემცველობა (კაკაოს ცხიმი და რძის ცხიმი) არანაკლებ 25 %-ს;

კ.ვ) რძის ცხიმის შემცველობა უნდა შეადგენდეს სულ მცირე 5,5%-ს, იმ შემთხვევაში თუ დასახელებაში სიტყვა „რძე“ შეცვლილია სიტყვით - „ნაღები“ და არაუმეტეს 1%-ს, თუ დასახელებაში სიტყვა „რძე“ შეცვლილია სიტყვით - „მოხდილი რძე“;

ლ) რძიანი შოკოლადი თხილით/ თხილიანი რძიანი შოკოლადი “Gianduja“ (ან სიტყვა „Gianduja“-დან წარმოშობილი ერთ-ერთი დასახელება) - პროდუქტი, რომელიც უპირველესად მიღებულია რძიანი შოკოლადისგან და შეიცავს არანაკლებ 10 % რძის მშრალ ნივთიერებას, რომელიც მიღებულია მოუხდელი რძის, ნახევრად ან სრულად მოხდილი (გაუცხიმოებული) რძის ან ნაღების ნაწილობრივ ან სრული დეჰიდრატაციით, ან ნაწილობრივ ან სრულად დეჰიდრირებული ნაღების, კარაქის ან რძის ცხიმისაგან და, ასევე, წვრილად დაქუცმაცებული თხილის გამოყენებით, რომლის შემცველობა 100 გ პროდუქტში უნდა შეადგენდეს არანაკლებ 15 გ-ს და არაუმეტეს 40 გ-ს. პროდუქტს შესაძლებელია დამატებული ჰქონდეს ნუში, თხილი ან კაკლისებრთა სხვა სახეობები, მთლიანი ან დამტვრეული(ნატეხები), იმ რაოდენობით, რომ დაქუცმაცებულ თხილთან ერთად მათი რაოდენობა არ უნდა აღემატებოდეს პროდუქტის საერთო წონის 60%-ს. ამასთანავე მასში:

ლ.ა) კაკაოს მშრალი ნივთიერების შემცველობა შეადგენს არანაკლებ 25%-ს;

ლ.ბ) კაკაოს უცხიმო მშრალი ნივთიერება შემცველობა შეადგენს არანაკლებ 2,5%-ს;

ლ.გ) რძის ცხიმის შემცველობა შეადგენს არანაკლებ 3,5 %-ს;

ლ.დ) საერთო ცხიმშემცველობა (კაკაოს ცხიმი და რძის ცხიმი) შეადგენს არანაკლებ 25 %-ს;

მ) რძიანი შოკოლადი „კუვერტური“ - რძიანი შოკოლადის პროდუქტი, რომელშიც:

მ.ა) კაკაოს მშრალი ნივთიერების შემცველობა შეადგენს არანაკლებ 25 %-ს;

მ.ბ) რძის მშრალი ნივთიერების შემცველობა, რომელიც მიღებულია მოუხდელი რძის, ნახევრად ან სრულად მოხდილი (გაუცხიმოებული) რძის, ნაღების ნაწილობრივ ან სრული დეჰიდრატაციით, ან ნაწილობრივ ან სრულად დეჰიდრირებული ნაღების, კარაქის ან რძის ცხიმისაგან, შეადგენს არანაკლებ 14 %-ს;

მ.გ) კაკაოს უცხიმო მშრალ ნივთიერების შემცველობა შეადგენს არანაკლებ 2,5 %-ს;

მ.დ) რძის ცხიმის შემცველობა შეადგენს არანაკლებ 3,5 %-ს;

მ.ე) საერთო ცხიმშემცველობა (კაკაოს ცხიმი და რძის ცხიმი) შეადგენს არანაკლებ 31 %-ს;

მ.ვ) რძის ცხიმის შემცველობა უნდა შეადგენდეს სულ მცირე 5,5%-ს, იმ შემთხვევაში თუ დასახელებაში სიტყვა „რძე“ შეცვლილია სიტყვით - „ნაღები“ და არაუმეტეს 1%-ს, თუ დასახელებაში სიტყვა „რძე“ შეცვლილია სიტყვით - “მოხდილი რძე“;

ნ) რძიანი შოკოლადი „ვერმიშელის“ ან „ფანტელის“ ფორმის - პროდუქტი, რომელიც წარმოდგენილია ვერმიშელის ან ფანტელის ფორმით და მიღებულია შერევის, ექსტრუზიის და გამყარების პროცესებით, რომელიც პროდუქტს ანიჭებს განსაკუთრებულ ხრამუნა თვისებას. შეიცავს მშრალ ნივთიერებაზე გადაანგარიშებით არანაკლებ 20 % კაკაოს მშრალ ნივთიერებებს, არანაკლებ 12 % რძის მშრალ ნივთიერებებს, რომელიც მიღებულია მოუხდელი რძის, ნახევრად ან სრულად მოხდილი (გაუცხიმოებული) რძის, ან ნაღების ნაწილობრივ ან სრული დეჰიდრატაციით ან ნაწილობრივ ან სრულად დეჰიდრირებული ნაღების, ნაღების კარაქის ან რძის ცხიმისაგან, და რომლის საერთო ცხიმშემცველობა (კაკაოს ცხიმი და რძის ცხიმი) შეადგენს არანაკლებ 12 %-ს. ამასთანავე მასში:

ნ.ა) კაკაოს უცხიმო მშრალ ნივთიერების შემცველობა შეადგენს არანაკლებ 2,5 %-ს;

ნ.ბ) რძის ცხიმის შემცველობა შეადგენს არანაკლებ 3,5 %-ს;

ნ.გ) რძის ცხიმის შემცველობა უნდა შეადგენდეს სულ მცირე 5,5%-ს, იმ შემთხვევაში თუ დასახელებაში სიტყვა „რძე“ შეცვლილია სიტყვით - „ნაღები“ და არაუმეტეს 1%-ს, თუ დასახელებაში სიტყვა „რძე“ შეცვლილია სიტყვით - “მოხდილი რძე“;

ო) საოჯახო (ოჯახური) რძიანი შოკოლადი - პროდუქტი, რომელიც მიღებულია კაკაოს პროდუქტების, შაქრების და რძის ან რძის ნაწარმისაგან და მშრალ ნივთიერებაზე გადაანგარიშებით შეიცავს:

ო.ა) არანაკლებ 20 % კაკაოს მშრალ ნივთიერებას;

ო.ბ) არანაკლებ 20 % რძის მშრალ ნივთიერებას, რომელიც მიღებულია მოუხდელი რძის, ნახევრად ან სრულად მოხდილი (გაუცხიმოებული) რძის, ნალების ნაწილობრივი ან სრული დეჰიდრატაციით ან ნაწილობრივ ან სრულად დეჰიდრირებული ნალების, კარაქის ან რძის ცხიმისაგან;

ო.გ) არანაკლებ 2,5 % კაკაოს უცხიმო მშრალ ნივთიერებას,

ო.დ) არანაკლებ 5 % რძის ცხიმს;

ო.ე) საერთო ცხიმშემცველობა (კაკაოს ცხიმი და რძის ცხიმი) არანაკლებ 25 %-ს.

პ) თეთრი შოკოლადი - პროდუქტი, რომელიც მიღებულია კაკაოს ცხიმისგან, რძის ან რძის ნაწარმისაგან და შაქრებისგან, რომელიც შეიცავს არანაკლებ 20 % კაკაოს ცხიმს და არანაკლებ 14 % რძის მშრალ ნივთიერებას, რომლებიც მიღებულია მოუხდელი რძის, ნახევრად ან სრულად მოხდილი (გაუცხიმოებული) რძის, ნალების ნაწილობრივი ან სრული დეჰიდრატაციით ან ნაწილობრივ ან სრულად დეჰიდრირებული ნალების, კარაქის ან რძის ცხიმისაგან და რომელშიც რძის ცხიმის შემცველობა არანაკლებ 3,5%-ია;

ჟ) შოკოლადი გულსართით, შოკოლადი..... - ის გულსართით, შოკოლადი

- ით - გულსართიანი პროდუქტი, რომლის გარეთა ზედაპირი დაფარულია ამ მუხლის „ვ-პ“ ქვეპუნქტებით განსაზღვრული ერთერთი პროდუქტით, რომლის რაოდენობა არ უნდა იყოს პროდუქტის საერთო მასის 25 %-ზე ნაკლები და რომლის გულსართის შედგენლობა არსებითად განსხვავდება გარეთა ზედაპირის შედგენლობისაგან. ამ დასახელებას არ მიეკუთვნება პროდუქტი, რომლის შიგთავსს წარმოადგენს ფქვილოვანი საკონდიტრო ნაწარმი, ერბოზელილი პურფუნთუშეული ნაწარმი, ორცობილა ან/და ნაყინის პროდუქტები;

რ) შოკოლადი *a la taza* - პროდუქტი, რომელიც მიღებულია კაკაოს პროდუქტების, შაქრების და ხორბლის, ბრინჯის ან სიმინდისა ფქვილის ან სახამებლისაგან და რომელიც, მშრალ ნივთიერებაზე გადაანგარიშებით, შეიცავს არანაკლებ 35% კაკაოს მშრალ ნივთიერებას, მათ შორის არანაკლებ 18 % კაკაოს ცხიმს, არანაკლებ 14 % კაკაოს მშრალ, უცხიმო ნივთიერებას და არაუმეტეს 8 % ფქვილს ან სახამებელს;

ს) **a la taza**-ს მსგავსი შოკოლადი - პროდუქტი, რომელიც მიღებულია კაკაოს პროდუქტების, შაქრების და ხორბლის, ბრინჯის ან სიმინდისა ფქვილის ან სახამებლისაგან და რომელიც, მშრალ ნივთიერებაზე გადაანგარიშებით, შეიცავს არანაკლებ 30 % კაკაოს მშრალ ნივთიერებებს, მათ შორის არანაკლებ 18 % კაკაოს ცხიმს, არანაკლებ 12 % კაკაოს მშრალ, უცხიმო ნივთიერებებს და არაუმეტეს 18% ფქვილს ან სახამებელს;

ტ) **შოკოლადის კანფეტი ან პრალინი** - მცირე ზომის პროდუქტი, რომელიც, როგორც წესი, მოიხმარება ერთ ულუფად და რომელშიც შოკოლადის კომპონენტი შეადგენს პროდუქტის საერთო მასის არანაკლებ 25%-ს. ასეთი პროდუქტი შესაძლებელია იყოს ერთერთი:

ტ.ა) შოკოლადი გულსართით;

ტ.ბ) ამ მუხლის „ვ-პ“ ქვეპუნქტებით განსაზღვრული ერთერთი შოკოლადი ან ამ შოკოლადების კომბინაცია ან ნარევი;

ტ.გ) სხვა, საკვებად ვარგისი ნივთიერებები;

უ) **ტკბილი შოკოლადი** - პროდუქტი, რომელიც მშრალ ნივთიერებებზე გადაანგარიშებით, შეიცავს არანაკლებ 30 % კაკაოს მშრალი ნივთიერებას, მათ შორის არანაკლებ 18 %-ს უნდა კაკაოს ცხიმს და არანაკლებ 12% კაკაოს უცხიმო მშრალ ნივთიერებას;

ფ) **შოკოლადი para mesa** - მსხვილად დაქუცმაცებული (დანაწევრებული) შოკოლადის პროდუქტი, რომელშიც შაქრის ნაწილაკების ზომა აღემატება 70 მიკრონს. მასში კაკაოს მშრალი ნივთიერების შემცველობა, მშრალ ნივთიერებაზე გადაანგარიშებით, შეადგენს არანაკლებ 20 %-ს, მათ შორის არანაკლებ 11 % კაკაოს ცხიმს და არანაკლებ 9% კაკაოს უცხიმო, მშრალ ნივთიერებებს;

ქ) **ნახევრადმწარე შოკოლადი para mesa** - მსხვილად დაქუცმაცებული (დანაწევრებული) შოკოლადის პროდუქტი, რომელშიც შაქრის ნაწილაკების ზომა აღემატება 70 მიკრონს. მასში კაკაოს მშრალი ნივთიერების შემცველობა, მშრალ ნივთიერებაზე გადაანგარიშებით, შეადგენს არანაკლებ 30%-ს, მათ შორის არანაკლებ 15 % კაკაოს ცხიმს და არანაკლებ 14 % კაკაოს უცხიმო მშრალ ნივთიერებებს;

ღ) **მწარე შოკოლადი para mesa** - შოკოლადი მსხვილი დაქუცმაცებით, რომელშიც შაქრის ნაწილაკების ზომა აღემატება 70 მიკრონს. მასში კაკაოს მშრალი ნივთიერების შემცველობა, მშრალ ნივთიერებაზე გადაანგარიშებით, შეადგენს არანაკლებ 40 %-ს, მათ შორის არანაკლებ 22 % კაკაოს ცხიმს და არანაკლებ 18 % კაკაოს უცხიმო მშრალ ნივთიერებებს;

მუხლი 5. ადამიანის მოხმარებისათვის განკუთვნილი კაკაოსა და შოკოლადის პროდუქტების ბაზარზე განთავსების პირობები

1. ბაზარზე განთავსებული ადამიანის მოხმარებისათვის განკუთვნილი კაკაოსა და შოკოლადის პროდუქტები უნდა აკმაყოფილებდეს ამ ტექნიკური რეგლამენტით და ასევე საქართველოს კანონმდებლობით დადგენილ მოთხოვნებს.

2. ბაზარზე განთავსებული ადამიანის მოხმარებისათვის განკუთვნილი კაკაოსა და შოკოლადის პროდუქტები ეტიკეტირებული უნდა იქნეს ამ ტექნიკური რეგლამენტისა და მოხმარებისათვის სურსათის შესახებ ინფორმაციის მიწოდების შესახებ საქართველოს კანონმდებლობით განსაზღვრული წესით.

3. გარდა ამ წესის მე-4 მუხლის „ა“ ქვეპუნქტით განსაზღვრული კაკაოს ცხიმისა, ამ წესის დანართი N1 „მცენარეული ცხიმებით“ განსაზღვრული ცხიმები შესაძლებელია დამატებული იქნას ამ წესის მე-4 მუხლის „ვ-პ“ და „რ-ს“ ქვეპუნქტებით განსაზღვრულ შოკოლადის პროდუქტებში, იმ პირობით, რომ დამატებული მცენარეული ცხიმების შემცველობა არ უნდა აღემატებოდეს საბოლოო, მზა პროდუქტის 5 %-ს, ამ წესის მე-6 მუხლით განსაზღვრული ნებაყოფლობითი (არასავალდებულო) დასაშვები ინგრედიენტების საერთო წონის გამოკლების შემდეგ, კაკაოს ცხიმის ან კაკაოს მშრალი ნივთიერებების შემცირების გარეშე, ამასთანავე, თითოეული მათგანი ან მათი ნარევი უნდა იყოს კაკაოს ცხიმის ექვივალენტური და აკმაყოფილებდენენ შემდეგ მაჩვენებლებს:

ა) მცენარეული ცხიმ(ებ)ი არ შეიცავს ლაურინის მჟავას და მდიდარია POP (პალმიტინის მჟავა, ოლეინის მჟავა, პალმინტინის მჟავა) , POSt (პალმიტინის მჟავა, ოლეინის მჟავა, სტეარინის მჟავა) და StOSt (სტეარინის მჟავა, ოლეინის მჟავა , სტეარინის მჟავა) ტიპის მონოუჯერი ტრიგლიცერიდებით;

ბ) მათი შერევა კაკაოს ცხიმთან ნებისმიერი პროპორციითაა შესაძლებელი და შეესაბამება კაკაოს ცხიმის ფიზიკური თვისებებს (ლღობის ტემპერატურა, კრისტალიზაციის ტემპერატურა, ლღობის მაჩვენებელი);

გ) მიღებულია მხოლოდ რაფინირების და/ან ფრაქციებად დაშლია გზით, რაც გამორიცხავს ტრიგლიცერიდული სტრუქტურის ფერმენტულ მოდიფიკაციას.

4. ამ მუხლის მე-3 პუნქტით განსაზღვრული შოკოლადის პროდუქტები, რომლებიც გარდა კაკაოს ცხიმისა შეიცავენ სხვა მცენარეულ ცხიმებს, შესაძლებელია ბაზარზე განთავსებული იქნას მხოლოდ იმ პირობით, რომ ეტიკეტზე, ინგრედიენტების ჩამონათვალთან, ხედვის იგივე არეალში მკვეთრად (მკაფიოდ),

ტიპოგრაფიულად ადვილად შესამჩნევად, მითითებული იქნება : „კაკაოს ცხიმთან ერთად შეიცავს მცენარეულ ცხიმებს“. პროდუქტის დასახელება შესაძლებელია განთავსებული იქნას ხედვის სხვა არეალში.

5. თუ მე-4 მუხლის „ვ-ჟ“ და „ტ“ ქვეპუნქტებით განსაზღვრული პროდუქტები ბაზარზე განთავსებულია ასორტიმენტის სახით, მათი დასახელებები შესაძლებელია შეიცვალოს დასახელებით „შოკოლადის ასორტი“ ან „გულსართიანი შოკოლადის ასორტი“ ან მსგავსი დასახელება. ამ შემთხვევაში დასაშვებია ასორტიმენტში შემავალი ყველა პროდუქტისათვის ინგრედიენტების ერთიანი ჩამონათვალის მითითება.

6. ამ რეგლამენტის მე-4 მუხლის „დ-ო“ და „რ-ს“ ქვეპუნქტებით განსაზღვრულ კაკაოსა და შოკოლადის პროდუქტების ეტიკეტზე მითითებული უნდა იქნას კაკაოს მშრალი ნივთიერების შემცველობა შემდეგი სიტყვებით: „კაკაოს მშრალი ნივთიერებები, სულ მცირე%“.

7. ამ რეგლამენტის მე-4 მუხლის „გ“ და „ე“ ქვეპუნქტებით განსაზღვრული პროდუქტების ეტიკეტზე მითითებული უნდა იქნეს კაკაოს ცხიმის რაოდენობა.

8. დასახელებასთან - „შოკოლადი“, „რძიანი შოკოლადი“ „შოკოლადი კუვერტური“, შესაძლებელია მითითებული იქნას ხარისხის მაჩვენებლებთან ან აღწერილობასთან დაკავშირებული ინფორმაცია, რომ პროდუქტი შეიცავს:

ა) შოკოლადისათვის - არანაკლებ 43 % კაკაოს მშრალ ნივთიერებებს, მათ შორის არანაკლებ 26 % კაკაოს ცხიმს;

ბ) რძიანი შოკოლადისათვის - არანაკლებ 30 % კაკოს მშრალ ნივთიერებებს და არანაკლებ 18 % რძის მშრალ ნივთიერებებს, რომელიც რომელიც მიღებულია მოუხდელი რძის, ნახევრად ან სრულად მოხდილი (გაუცხიმოებული) რძის, ნაღების ნაწილობრივ ან სრული დეჰიდრატაციით, ან ნაწილობრივ ან სრულად დეჰიდრირებული ნაღების, კარაქის ან რძის ცხიმისაგან, მათ შორის არანაკლებ 4,5 % რძის ცხიმს;

გ) შოკოლადი კუვერტურისათვის - არანაკლებ 16 % კაკაოს მშრალ, უცხიმო ნივთიერებებს.

მუხლი 6. ნებაყოფლობითი (არასავალდებულო) დასაშვები ინგრედიენტები

1. გარდა ამ რეგლამენტის მე-7 მუხლის და ამ მუხლის მე-2 პუნქტით განსაზღვრული ნივთიერებებისა მე-4 მუხლის „ვ-პ“ და „რ-ს“ ქვეპუნქტებით განსაზღვრულ შოკოლადის პროდუქტებში შესაძლებელია დამატებული იქნას სხვა საკვები ნივთიერებები შემდეგი პირობების გათვალისწინებით:

ა) დაუშვებელია იმ ცხოველური ცხიმების და მათგან წარმოებულების დამატება, რომელიც არ არის წარმოებული რძისაგან;

ბ) ფქვილის, სახამებლის გრანულების ან ფხვნილის დამატება დასაშვებია მხოლოდ ამ რეგლამენტის მე-4 მუხლის „რ“ და „ს“ ქვეპუნქტებით განსაზღვრული მოთხოვნების შესაბამისად;

გ) დამატებული საკვები ნივთიერებების რაოდენობა არ უნდა აღემატებოდეს მზა პროდუქტის საერთო წონის 40%-ს.

2. ამ რეგლამენტის მე-4 მუხლის „ბ-პ“, „რ“ და „ს“, „უ-დ“ ქვეპუნქტებით განსაზღვრულ პროდუქტებზე დასაშვებია მხოლოდ იმ არომატიზატორების დამატება, რომელიც არ ახდენენ შოკოლადის და რძის ცხიმის გემოს იმიტაციას/სიმულაციას.

3. დასაშვებია არომატიზატორები - ვანილინისა და ეთილვანილინის გამოყენება ცალ-ცალკე ან კომბინაციაში ისე, რომ მათი შემცველობა არ უნდა აღემატებოდეს 1000 მგ/კგ-ს.

4. ამ რეგლამენტით განსაზღვრულ ადამიანის მოხმარებისათვის განკუთვნილი კაკაოსა და შოკოლადის პროდუქტების წარმოებაში დასაშვებია საკვებდანამატების გამოყენება, საქართველოს კანონმდებლობით განსაზღვრული მოთხოვნების გათვალისწინებით.

5. ამ რეგლამენტით განსაზღვრულ ადამიანის მოხმარებისათვის განკუთვნილი კაკაოსა და შოკოლადის პროდუქტების წარმოებაში გარდა საქართველოს კანონმდებლობით განსაზღვრული შაქრებისა, დასაშვებია და შაქრის შემცველების (დამატკბობლების) გამოყენება იმ პირობით, რომ შაქრების სრული ან ნაწილობრივი ჩანაცვლების შემთხვევაში სათანადო ინფორმაცია უნდა განთავსდეს შოკოლადის დასახელებასთან ახლოს.

მუხლი 7. პროცენტული რაოდენობის გამოანგარიშება

1. ამ რეგლამენტის მე-4 მუხლის „ვ-პ“, „რ“ და „ს“ ქვეპუნქტებით განსაზღვრულ პროდუქტებისათვის მინიმალური შემცველობის გამოანგარიშება ხდება ამ რეგლამენტის მე-6 მუხლის პირველი და მე-2 ქვეპუნქტებით განსაზღვრული ინგრედიენტების წონის გამოკლების შემდეგ.

2. ამ რეგლამენტის მე-4 მუხლის „ჟ“ და „ტ“ ქვეპუნქტებით განსაზღვრული პროდუქტებისათვის, მინიმალური შემცველობის გამომწვევა ხდება ამ რეგლამენტის მე-6 მუხლის პირველი და მე-2 ქვეპუნქტებით განსაზღვრული ინგრედიენტების წონისა და გულსართის წონის გამოკლების შემდეგ.

3. ამ რეგლამენტის მე-4 მუხლის მე-3 პუნქტის „ჟ“ და „ტ“ ქვეპუნქტებით განსაზღვრულ პროდუქტებში შოკოლადის შემცველობა გამოიანგარიშება მზა პროდუქტის საერთო წონის შესაბამისად, რომელიც მოიცავს ასევე გულსართის წონასაც.

მუხლი 8. მოთხოვნები ბიზნესოპერატორის მიმართ

1. ბიზნესოპერატორი ვალდებულია:

ა) უზრუნველყოს ადამიანის მოხმარებისათვის განკუთვნილი კაკაოსა და შოკოლადის პროდუქტების შესაბამისობა ამ ტექნიკური რეგლამენტით და საქართველოს კანონმდებლობით განსაზღვრულ მოთხოვნებთან;

ბ) დაიცვას საქართველოს კანონმდებლობით განსაზღვრული ჰიგიენის ზოგადი მოთხოვნები ადამიანის მოხმარებისათვის განკუთვნილი კაკაოსა და შოკოლადის პროდუქტების წარმოების, გადამუშავების ან/და დისტრიბუციის ეტაპებზე;

2. შესაძლებელია ბიზნესოპერატორმა, რომელიც ახორციელებს ადამიანის მოხმარებისათვის განკუთვნილი კაკაოსა და შოკოლადის პროდუქტების შწარმოებას, გადამუშავებას ან/და დისტრიბუციას, გამოიყენოს ამ მუხლის პირველი პუნქტის „ბ“ ქვეპუნქტით განსაზღვრული მოთხოვნებისგან განსხვავებული მოთხოვნები იმ შემთხვევაში, თუ მის მიერ დასაბუთებული იქნება, რომ გამოყენებული განსხვავებული მოთხოვნებით უზრუნველყოფილია ჰიგიენის ზოგადი მოთხოვნების დაცვა.

მუხლი 9. შესაბამისობის კონტროლი

ადამიანის მოხმარებისათვის განკუთვნილი კაკაოსა და შოკოლადის პროდუქტების წინამდებარე ტექნიკურ რეგლამენტთან შესაბამისობის კონტროლი ხორციელდება:

ა) საჯარო სამართლის იურიდიული პირის - სურსათის ეროვნული სააგენტოს მიერ სახელმწიფო კონტროლის დროს;

ბ) საჯარო სამართლის იურიდიული პირის - შემოსავლების სამსახურის მიერ

საქართველოს საბაჟო საზღვარზე გადაადგილებისას;
 გ) ბიზნესოპერატორის მიერ, შიდა საწარმოო კონტროლოს დროს.

დანართი N1

მცენარეული ცხიმები

N	მცენარეულის ცხიმის დასახელება	მცენარის სამეცნირო (ბოტანიკური) დასახელება, რომლისგანაც მიიღება ჩამოთვლილი ცხიმები
1	ბორნოს ცხიმი Illipe, Borneo tallow or Tengkawang	Shorea spp.
2	პალმის ზეთი (Palm oil)	Elaeis guineensis Elaeis olifera
3	Sal	Shorea robusta
4	Shea	Butyrospermum parkii
5	Kokum gurgi	Garcinia indica
6	მანგოს თესლის ცხიმი (Mango kernel)	Mangifera indica
შენიშვნა	შოკოლადში დასაშვებია ქოქოსის ზეთის გამოყენება მხოლოდ ნაყინის ამ სხვა მსგავსი პროდუქტების დამზადებისათვის	